

四庫全書

史部

欽定四庫全書

史部

平定三逆方畧卷

五十六至
六十

詳校官編修臣曹振鏞

編修臣裴謙覆勘

總校官候補中書臣潘有為

校對官中書臣李斯咏

謄錄監生臣邵延曾

欽定四庫全書

平定三逆方略卷五十六

康熙二十年正月丁巳

勅大將軍貝子彰泰等親帥師剿賊

彰泰等疏言提督桑額等報偽留守將軍及三
偽將奎普安率其衆萬二千人欲據盤江臣隨
遣安順府駐防署前鋒統領薩克察巴圖魯等
率每佐領兵三名有奇令固守鐵索橋諸處

上諭廣西大兵已入滇境貝子彰泰等兵宜乘機速行
進剿今大兵秣馬貴陽已經月餘且鐵索橋盤江最
為要地提督桑額等既報逆賊欲據盤江貝子彰泰
總督蔡毓榮等不躬親馳赴扼據要害撲滅賊寇止
遣薩克察巴圖魯等率兵前往殊非事宜彰泰等其
親統大兵迅往剿賊平定滇中勿失機會

臣謹按盤江鐵索橋乃滇黔咽喉為必爭要
地我兵據之則可以長驅無梗直薄滇城若

為賊所扼亦可以負固自守苟延喙息故賊將數人統萬餘之衆悉力來爭是時彰泰等宜即躬統重兵星馳拒守乃竟不親行僅遣薩克察巴圖魯率每佐領兵三人以往

皇上聞之即慮兵力尚單脫賊先據其地則我師不能驟渡或致相持日久亟

勅彰泰等統率士馬疾行進剿彰泰等奉

命速行果能乘賊未到先渡盤江遂得進抵滇中與諸

道會師擊滅逆寇蓋

皇上深知地利先事調度故能使賊狡計莫展勢威力
殫不旋踵而悉皆顛踣也

庚申以龍天佑為管領土司總兵官

大將軍貝子彰泰等奏土司龍天佑詣臣軍迎
降即勦茂口賊仍身率土司目兵防守要隘感
念

國恩特為輸力

上諭以龍天佑為都督僉事授管領土司總兵官

丙寅趣大將軍貝子彰泰等速進雲南

上諭議政王等曰貝子彰泰等若乘逆賊敗走雲南之際即行追躡則雲南早已蕩平乃先借秣馬逗遛今復以逆賊肆犯推諉殊屬不合目前逆賊困迫已極旦夕滅亡若不乘機剪除恢復定滇土更需何日且大將軍賴塔等兵抵田州即進定雲南為日已久彰泰等於諭旨到日即率滿洲綠旗大兵之半速進雲南

至於貴州亦屬重要可選賢能大臣及總督提督等
統留半之兵令其固守彰泰等若仍前逗遛不疾馳
進定雲南旋師日從重治罪

命候補馬山偏圖為雲南總兵官

提督桑額奏雞公背鐵索橋乃險要重地悉為
我有滇省蕩平可立而待雲南舊設七鎮分汎
防守今當地方初復請

勅部遴選能員星馳赴鎮彈壓

上諭候補雲貴總兵官馬山偏圖可先授為雲南總兵
官其餘五鎮員缺俟雲南收復日遞補

壬申

詔送李本深至京師

大將軍貝子彰泰等奏原任提督偽將軍李本
深及大小文武官悉繳偽印劄相繼歸誠

上命送李本深來京餘令量行安插俾其得所

將軍王進寶請赴瀘州勦賊

上不許

進寶疏言乞以將軍佛尼勒調往官兵及隨

臣

駐防保寧官兵付

臣與

子用予率之先勦瀘

州逆賊乘勝進取遵義俟遵義克復

臣

仍還保

寧

上諭保寧諸處所關最要將軍王進寶仍遵前旨駐鎮

保寧綏輯蜀境

乙亥將軍噶爾漢等奏復忠州萬縣諸處

時逆賊譚洪死噶爾漢等兵復擊敗鄖陽之賊
洪子天秘震恐遂焚萬縣賊巢天賜城寨以遁
於是我兵直進萬縣開縣建始忠州梁山悉定
丙子

命將軍噶爾漢進取遵義貝子準達還荊州

初準達奏水陸兩路進兵

上以準達前屢被勅進討譚洪彭時亨等乃推諉不前
今見噶爾漢哈占等擊斬逆賊譚洪彭時亨殆

盡始奏水陸進兵殊為不合因下

詔責之復

諭兵部今譚洪黨羽俱已就戮萬縣諸地悉經收復宜簡精兵健馬速取遵義將軍噶爾漢其簡選士馬疾行率赴重慶盡統貝子準達軍速定遵義副都統得爾德等兵亦聽調用萬縣地處狹隘難以飼馬可趨至重慶秣馬而進噶爾漢軍中効力有年困乏無馬者準達悉行收取率還荊州至於夔州要地令提督

徐治都率標兵暫駐防守總督哈占可率所屬兵馳赴叙州府與大兵協力前驅勦賊

戊寅

命巡撫王新命運進蜀大兵糧餉

郎中額爾赫圖奏請速撥湖廣額銀十萬兩解至臣所又運到軍糈僅支目下初無贏積今乘川江水退宜多運糧米於軍中

上諭大兵糧餉所關重大巡撫王新命可先撥湖廣銀

十萬兩星夜解交郎中額爾赫圖至於由川江運送
兵米亦宜乘此水退之時源源不絕速運軍前如或
遲緩貽誤軍機所司各官俱按軍法重懲不宥

辛巳大將軍公圖海請赴援叙州

上不許

圖海奏逆賊并力來犯四川叙州諸處汛守滿

漢官兵頗為單弱臣請量率兵馬往援

上諭大將軍公圖海既調副都統翁愛率所部官兵自

成都往援叙州總督哈占總兵官高孟又各率官兵
赴叙圖海所奏不准行其仍駐漢中防守秦蜀

癸未贈將軍巡撫傅宏烈太子太師

時宏烈陷賊不屈不受偽職賊怒遂遇害理事
官麻勒吉以

聞

上諭傅宏烈自歸誠以來効力粵西著有勞績今陷賊
不屈捐軀殉難忠義深為可憫從優贈太子太師廕

一子入監讀書

革學士孔國岱等職

先是孔國岱等奏報已抵廣東會城

上諭議政王等曰孔國岱等當進兵時不趣尚之信速
發凡事又不預行詳報今乃以抵會城奏聞不合俟
還日審取確供議奏至是孔國岱等至京議政王等

取孔國岱及侍講學士薩喇供詞議各銷一級

罰俸一年

上諭初遣孔國岱薩喇前往時曾有密旨令其以粵東
事機滇黔賊情及尚之信狂悖之狀不時報聞乃孔
國岱等行後從無一報情殊可惡所議尚輕其再議
具奏於是議政王等又議各降四級調用

上諭孔國岱薩喇奉遣時諭旨甚明乃凡事不行奏報
其畏懼尚之信無疑議政王大臣于駁令再議之事
仍行輕議殊為不合孔國岱薩喇俱革職

二月乙巳大將軍賴塔奏復安籠所

時偽將軍何繼祖等據衆萬餘距安龍所三十里堅據石門坎隘口賴塔等遣都統貝勒希福馬奇護軍統領額赫訥等率前隊官兵先驅撲勦正月一日大敗賊衆奪石門坎隘口尋復安龍所城偽總兵陳義魁等率衆迎降

戊申

命巡撫鄂愷等遣官購買永寧一路兵糧

總督哈占言永寧一路大兵糧米最要秦民輸

運軍需困敝已極若於永寧瀘州諸處採買支
給實兵民兩便

上諭陝西巡撫鄂愷等支西安庫銀六萬兩遴選道員
同知等官遣往永寧瀘州諸處與永寧道官會同採
買四川巡撫杭愛布政使劉顯第等督趣監理勿悞
軍需

壬子

勅巡撫楊雍建招集流民

雍正奏言貴陽省會尚有未燬民居宜令流散
人民復其本業量減徭役俾得補葺室廬至貴
陽南北大路民居皆新經招集亦應量減差徭
其供應夫役私派並請禁止

上諭貴州巡撫楊雍建速行設策招集流民還業務令
得所除供應大兵諸正役外有以私事借端多索人
夫擾民者該巡撫即指名劾奏兼檄在黔將軍提鎮
令嚴加禁戢

癸丑將軍穆占等奏復平遠

時偽大將軍高啓隆偽將軍夏國相王會王永清張足法楊應選儂朋擁衆二萬餘人屯踞平遠西南山上將軍穆占提督趙賴率滿漢官兵於正月二十二日進擊連敗之高啓隆等俱遁走王會率其標下弁兵詣軍前降我兵遂復平

遠府

平定三逆方畧卷五十六

欽定四庫全書

平定三逆方略卷五十七

康熙二十年三月甲寅朔

命都統覺羅吉哈禮為宣威將軍

將軍鄂克濟哈等言建昌官兵棄城突出悉由

臣等庸劣不能救援所致罪俱在臣乞嚴加處

分

上諭鄂克濟哈久駐成都既不能退叙州諸處來犯之

賊復不馳援建昌以致失陷令解將軍任還漢中同
大將軍公圖海守漢中諸處以都統覺羅吉哈禮為
宣威將軍統其所部官兵馳赴將軍總督趙良棟軍
前會商勦禦賊寇綏輯疆圉

丁巳貝子準達請仍帥師進取遵義

上不許

準達奏言臣兵分防各路所餘無幾緣進討力
單故以綠旗兵為請嗣以南川諸處賊警稍緩

臣即親統官兵鼓行而進安敢推諉不前請以
臣原轄之兵仍付臣率之以取遵義

上諭準達自抵重慶並無寸功今若復令統兵必致貽
誤事機其仍遵前旨率疲憊兵丁速回荊州令將軍
噶爾漢疾馳進取遵義

壬戌將軍佛尼勒奏復馬湖

時偽將軍胡國柱等率衆二萬餘犯寶壩大溪
口諸處佛尼勒率滿漢官兵進擊大破之乘勝

遂復馬湖府

癸亥

命將軍噶爾漢等帥師赴叙州

先是命噶爾漢同總兵官王用子進取遵義至
是總督董衛國等兵已克遵義賊犯瀘州叙州
諸路

上因復命噶爾漢率兵馳赴叙州速勦逆賊竟入雲南
王用子亦率兵與噶爾漢同至叙州滅賊之後

即駐鎮叙州諸處

甲子大將軍賴塔奏大敗賊于黃草壩

時賊將何繼祖等自石門坎敗遁至新城所會
偽將軍詹養等率衆幾二萬人據黃草壩列鹿
角換牌驅象迎敵賴塔于二月二日分布滿漢
官兵躬親指示自卯戰至日晡賊大敗奪其營
二十二生擒偽將軍詹養王有功及賊衆千餘
人得獲象馬無算賴塔以

聞

上諭賴塔自閩廣深入雲南獨先諸路大創逆賊調度
有方將士奮勇殊屬可嘉在事有功人員著從優議
叙具奏

將軍穆占奏復黔西大定

穆占等既下平遠即公議遣土司頭目阿五等
恢復黔西大定二府追擊逆賊斬殺甚多生擒
偽巡撫張維堅等于軍前正法

丙寅

勅大將軍公圖海等遣兵勦慶陽賊

巡撫巴錫奏報慶陽所屬地方有賊渠景飛等

自稱王偽設總兵副將等官聲言先取慶陽後

定三邊臣已遣兵往勦

上命大將軍公圖海將軍侯張勇提督孫思克等速遣

官兵勦滅賊渠景飛等務絕根株勿使滋蔓

戊辰大將軍賴塔奏復曲靖

賴塔等率大兵自黃草壩前進二月十一日抵
曲靖府偽總兵尹士元等率衆出城迎降賴塔
分遣官兵并復交水城

辛未大將軍貝子彰泰賴塔等奏敗賊於歸化寺
彰泰等兵抵曲靖與賴塔合兵齊進距雲南省
城十里營于歸化寺二月二十一日賊渠吳世
璠遣發偽將軍胡國柄劉起龍黃明率馬步賊
兵萬餘攜鹿角挨牌驅衆迎敵我兵大敗之追

至城下陣斬胡國柄劉起龍生擒賊弁兵六百餘人

癸酉

命將軍佛尼勒等帥師窮追逆賊

先是

上諭兵部將軍佛尼勒報瀘州江岸屯踞之賊已經敗走今大將軍貝子彰泰大將軍賴塔等兵已抵雲南省會大敗逆賊旦夕其城可下度叙州賊將胡國柱

王叙黑邦俊等必且遁逃如胡國柱等遁去將軍佛
尼勒趙良棟等即率兵速行追剿至是賴塔等奏言
大兵已逼雲南省城掘濠圍困詢之降人言吳
世璠殊無降意嬰城死守往調在蜀賊將馬寶
胡國柱夏國相等應援佛尼勒等復奏叙州對
壘賊將胡國柱等悉遁

上因復諭曰逆賊胡國柱等退援雲南事關重大將軍
佛尼勒趙良棟等于文到日即各統官兵速行躡擊

俾逆賊不得至雲南悉就勦除將軍噶爾漢吉哈禮
等到日亦即與佛尼勒等協力追賊如延遲觀望有
失事機俱以貽誤軍情重處

臣謹按當大兵之初抵滇省也

皇上即料川中賊將必棄營奔還自顧巢穴若使之合
勢併力恐撲滅需時乃

命佛尼勒等於賊遁走時即率兵追勦至是逆渠吳世
璠調賊將馬寶等還胡國柱等亦棄叙州遁

回報至

皇上復嚴諭佛尼勒等速行躡擊俾賊不得至雲南悉就剿除于是諸將奉

命分道窮追賊果披靡潰散或迫蹙歸降或束手就縛或為我兵斬馘終無一人得至滇者蓋

皇上先事預籌曾不少緩應機默運罔有或踈所以諸路賊黨次第殄平逆渠世璠不旋踵而授首也

甲戌大將軍貝子彰泰賴塔等奏復武定

大兵抵雲南偽將軍韓天福率偽官兵與和曲
長官司偽總兵那天鳳等縛防守武定偽總兵
王來吉何興祚以武定府城降

四月庚寅將軍穆占等奏偽將軍楊應選降

時偽將軍高啓隆楊應選等自平遠敗遁穆占
等遣人往撫於是應選棄其黨衆惟率所部偽
官兵家口及偽將軍王永清妻子繳印劄來降

壬辰將軍佛尼勒等奏復永寧

時駐守永寧偽將軍宋國輔遣人乞降佛尼勒
即令署副都統覺和托率兵往撫又親統官兵
繼進於是國輔及偽將軍陸道清率衆以永寧
降三月十五日我兵入城

丙申

勅巡撫王新命等速運進蜀兵餉

提督徐治都奏言譚天秘遁入叢山深麓進兵

勦蕩轉餉維難已留兵開縣要地相機招撫外
臣於三月十日自萬縣還駐夔州

上諭巡撫王新命郎中范承勲等乘川峽未漲速運糧
米用濟軍需苟有稽延俱以貽誤軍機治罪

贈總督甘文焜兵部尚書

當吳三桂初反文焜聞變自貴陽還至鎮遠為
叛寇要截遂自殺至是偏沅巡撫韓世琦收其
骸骨奏

聞

上諭甘文焜可贈兵部尚書廕一子入監讀書未幾將
軍總督蔡毓榮奏吳三桂初反時巡撫朱國治
抗不從逆為其所害

上因贈國治戶部右侍郎亦廕一子入監讀書

辛丑

勅將軍噶爾漢等同總督哈占等速進雲南

將軍佛尼勒疏言臣所部兵由陝入蜀諸路征

勦歷有年所致馬匹缺乏軍械敝壞困苦已極
如率此兵前進似屬無濟請以重慶護軍統領
佟佳等所部每佐領護軍各二人將軍噶爾漢
等兵內撥每佐領驍騎各三人西安副都統翁
愛兵八百人付臣等統領進定雲南將軍吉哈
禮所部兵盡發建昌一路漢中陝西諸處竟致
空虛請以年久困乏之兵遣赴大將軍公圖海
軍令防守漢中諸路

上諭今諸路逆賊俱遁還雲南或恐中外交攻將軍噶爾漢不必於重慶秣馬即馳會將軍佛尼勒軍每佐領簡六七人以留兵之馬給之躬自統率同總督哈占等前進雲南佛尼勒量率留兵防守叙州諸處其困苦無馬之兵令署副都統覺和托率赴漢中將軍吉哈禮每佐領簡官兵六七人同將軍總督趙良棟速進雲南如有困苦無馬者令副都統恰塔率回成都防守

甲辰

命戶部郎中明格禮等赴雲南採買兵糧

雲南巡撫伊闢疏言兩路大兵齊集滇中請亟
令貴州廣西二路協濟銀米

上諭廣西雲南相去遼遠路險山多且有苗蠻盤踞大
兵糧餉關係良急若由廣西轉運必致有誤軍需如
止令該撫一人料理恐亦不無貽誤其遣戶部郎中
明格禮沙木哈馳赴雲南與大將軍將軍督撫提督

等會同酌議撫恤民人設法採買勿悞軍需不必由
廣西貴州運致

命郎中額爾赫圖等趣將軍覺羅吉哈禮噶爾漢兩路
進兵

議政王等奏言克取雲南省會所關至要向趣
大將軍賴塔等軍曾遣學士額庫禮今趣將軍
覺羅吉哈禮噶爾漢等兩路之兵應遣部院賢
能官各一員前往

上諭自京遣官有需時日前遣理餉郎中額爾赫圖范承勲現在軍中可令額爾赫圖赴吉哈禮范承勲赴噶爾漢軍速趣大兵前進仍令兼理糧務大兵進止逆賊情形其令不時以聞

戊申

命將軍穆占還貴州

穆占奏言平遠大定黔西遵義悉經恢復諸處向有賊將俱奔赴雲南貴州無警臣已同參贊

都統華色漢軍副都統宜思孝遵大將軍貝子
等檄率護軍驍騎漢軍兵每佐領四人指雲南
而進餘兵付前鋒統領薩克察巴圖魯總督董
衛國等留鎮貴州

上諭賊雖奔散黔省有土司苗蠻雜處關係匪輕將軍
穆占酌量率兵仍回貴州統攝官兵固守疆土副
都統華色宜思孝既已前赴雲南薩克察巴圖魯不
必赴雲南

己酉大將軍貝子彰泰賴塔等奏偽將軍張國柱等降

時彰泰等率大兵圍雲南省城宣布

皇上好生之仁遣使招撫諸路大理府偽定遠大將軍

東平公張國柱臨安偽總兵徐衷明李三彬羅

文獻永順鎮偽總兵郭壯興范應泰姚安府偽

親軍車騎後將軍劉漢章總兵謝文明自蜀遁

回偽親軍鐵騎左將軍楊洪德及偽將軍趙玉

楊開運高啓隆劉魁白起昇儼朋邵文魁劉培
吾偽總兵高攀喜楊斌等各率所部偽官員兵
丁呈繳印劄相繼詣軍門降

辛亥

命卽中蘇赫臣等速運大兵糧餉

將軍總督趙良棟等奏言

臣

遣人密探各營不

惟前行無有裹糧卽目前亦已告匱

臣

因檄令

暫還銅河就食

上諭大兵見圍雲南省會自蜀前進之兵關係至急卽
中蘇赫臣等與該督撫會商務殫心竭力速策運餉
勿悞軍需如悞饋餉致失軍機以軍法從事

平定三逆方畧卷五十七

欽定四庫全書

平定三逆方略卷五十八

康熙二十年五月丁巳

命總兵官王用予馳赴永寧

總督哈占奏言臣發前隊官兵自永寧啓行即
親統士卒相續前進由赤水畢節追勦逆賊馬
寶進定雲南但臣所部兵為數無多力甚單弱
永寧係新復之地且接壤貴州土司雜處請

勅固原總兵官王用予率其標下官兵來永寧為臣後

繼

上命總兵官王用予速率所部馳赴永寧固守

勅大將軍貝子彰泰賴塔等招徠土司苗蠻

將軍海潮龍奏言兵以食為重若不急先安撫

百姓綏輯土司萬一失其所望遠避深山則軍

糈從何措置

上命大將軍貝子彰泰賴塔將軍總督蔡毓榮等加意

招徠獎勵土司苗蠻勿致有悞兵餉將軍總督趙良棟抵雲南亦須善為撫綏令軍楮無誤

庚午

命巡撫韓世琦等勦撫黃明諸逆

廣西提督哲勒肯奏逆賊黃明馬承烈等於三月十八日俱入湖廣靖州八萬徭內臣疊據偵報皆云逆賊深入古州徭峒是黃明等或由楚界投賊或入徭峒負固俱未可知疏入

上命巡撫韓世琦署巡撫事麻勒吉沅州總兵官和山
永州總兵官盧崇耀就近速行勦撫務盡根株

丙子趣總督哈占等速運大兵糧餉

將軍覺羅吉哈禮等奏言將軍趙良棟親統綠
旗官兵進自雅州臣盡率前鋒及每佐領護軍
驍騎各一人於本月十一日起行相繼前進因
見在米少滿洲綠旗騎兵止齋二十日糧步卒
止齋十五日糧已留參贊副都統席布統每佐

領官兵各四人有奇駐雅州令得糧即攜齎以
進臣等所挈糧糗無多不可無米接濟請更行
嚴勅疏入

上諭將軍吉哈禮噶爾漢等兩路征進大兵糧餉最為
急需總督哈占巡撫杭愛郎中蘇赫臣額爾赫圖范
承勲等以進征大兵攜帶之糧及繼運之米陸續速
運務令無悞如少稽緩從重治罪

辛巳大將軍貝子彰泰賴塔等奏復鶴慶麗江

時大兵抵雲南會城偽將軍李發美聞風震聳
遂舉發逆賊吳世璠與達賴喇嘛請兵偽書率
其部下偽官兵以鶴慶麗江二府降

六月戊子

命罷將軍穆占還黔

大將軍貝子彰泰賴塔等奏言將軍穆占宜令
率官兵還黔但今楚雄府有偽將軍陳光祿等
復叛從賊臣等擬令都統希福等率兵往勦如

又量撥官兵付穆占率回黔中則圍城兵力不
支況諸路賊勢悉向雲南請就近令常德滿兵
進貴州遣貴州薩克察巴圖魯等兵赴雲南則
攻圍調遣似有裨益疏入

上諭平定滇中最為要計將軍穆占不必遣還貴州令
署前鋒統領薩克察巴圖魯率所部每佐領兵三人
速赴雲南常德署副都統諾敏率所部兵速往貴州
與總督董衛國提督趙賴周卜世等固守貴州荊州

副都統莫達率所部每佐領兵二人赴常德駐鎮

壬寅贈提督伯王之鼎總兵官費雅達太子少保
時四川建昌衛陷賊之鼎等被執不屈遇害

上諭吏部曰提督伯王之鼎總兵官費雅達等以單弱
之兵堅守孤城衆寡不敵因致城陷矢志不為賊屈
竭忠殉難深可憫惻王之鼎贈太子少保費雅達贈
太子少保授為左都督準副都統陣亡例其子俱授
拜他喇布勒哈番

甲辰

命大將軍貝子彰泰賴塔等遣詣悉賊情人員乘傳詣

京師

上諭議政王等曰傳諭大將軍貝子彰泰賴塔將軍總
督趙良棟等見在投誠人員內有原屬吳三桂下舊
人且親近知賊情始末及吳應麒腹心信用者大將
軍等親加詳察令馳驛來京至投誠土司偽總兵陸
道清及海潮龍心腹同往達賴喇嘛處者并切知賊

情始末人員令趙良棟親加詳察亦令馳驛來京以
備詢問

庚戌

命副都統得爾德率兵赴叙州

將軍噶爾漢奏臣兵自重慶啓行時因副都統

得爾德兵丁馬疲令於重慶秣馬十日即赴軍

前及檄令率所部兵馳赴叙州乃不遵檄前往

比臣兵抵瀘州督趣攜帶糧糗得爾德率兵至

乃稱其兵馬疲宜遣赴叙州惟彼一身務欲隨
征不從臣約束

上諭副都統得爾德兵沿途取支芻秣且荊州彝陵飼
馬四月有餘而馬仍疲瘦及令率所部兵赴叙州復
不遵將軍調遣欲孑身前進殊屬不合宜將得爾德
即嚴察議處但見在行間俟事平旋師日察議仍令
得爾德率所部兵赴叙州聽將軍佛尼勒調遣

七月甲寅

命總督哈占等速撫譚天秘

提督徐治都奏臣檄駐守開縣叅將塗鎰遣人
接應譚洪之子天秘天秘已約六月十六日赴
夔州投誠因川陝總督復遣官招彼屬員令赴
陝投誠是以未即就撫

上諭譚天秘先欲投誠已經檄送偽印今或赴哈占軍
前投誠或赴徐治都軍前投誠俱宜速行招撫哈占
等其更遣能員多方招致毋令遷延時日

辛酉大將軍貝子彰泰賴塔等奏敗賊於烏木山
彰泰等趣都統希福提督桑額率兵進擊楚雄
逆寇偽國公馬寶等詐敗以誘我兵希福等追
至烏木山賊復據險以待我兵奮擊大敗之擒
斬甚衆馬寶越山而遁僅以身免

乙丑將軍總督趙良棟奏復建昌

時良棟遣總兵官李之芳等率兵進勦逆賊胡
國柱等敗走建昌遂復

戊辰

命大將軍公圖海還京師

上諭兵部大將軍都統大學士公圖海年老有疾今四
川雲南諸地俱已平定可令攜大將軍勅印同鄂克
濟哈還京師留將軍烏丹守漢中將軍王輔臣可了
身同圖海來京陛見

命逮馬寶來京

大將軍貝子彰泰賴塔等奏據都統希福等報

偽國公馬寶偽將軍巴養元等繳印投降於本月五日馬寶等俱至軍前

上諭逆賊馬寶所在抗拒大兵今無地可遁力窮勢迫始來投誠殊屬可惡所犯情罪重大斷不可宥大將軍貝子彰泰等其執馬寶撥官兵嚴解來京其餘偽屬官兵大將軍如常發落尋彰泰等又奏大兵至滇環困城池招撫賊寇馬寶等背叛

國恩臣事吳世璠屢次招撫不即悔罪投誠反奔尋甸

攜妻子赴楚雄糾集逆黨蹂躪疆圉為大兵所
敗窮蹙已極方率衆不滿百人往姚安投降非
首先向化歸誠者可比偽將軍巴養元趙國祚
鄭旺李繼業偽總兵郎應璧等亦與馬寶同在
一所若輩宜作何發落仰乞

睿裁

上命巴養元等亦同馬寶執送京師

趣將軍覺羅吉哈禮等進兵

安塘筆帖式報偽將軍胡國柱王叙等所部賊衆自姚安逃散過半胡國柱等俱遁入山中

上命以此事移知將軍吉哈禮噶爾漢趙良棟總督哈占令速行進兵

乙亥

勅巡撫楊雍建速修鐵索橋

兵部奏大將軍貝子彰泰咨稱前經行文黔撫楊雍建令其修理鐵索橋至今尚未興工請由

部具題移令作速修理凡修理橋梁乃地方官
專責宜移文該撫速行修理

上諭鐵索橋係運餉及大兵往返要路關係重大將
軍貝子彰泰行文修理該撫理宜速行葺治乃至今
尚未興工殊辜職任著該撫將鐵索橋速行修理以
便行軍轉餉

平定三逆方畧卷五十八

欽定四庫全書

平定三逆方畧卷五十九

康熙二十年八月辛巳朔

命給都統王國棟卹典

上諭兵部原任平南王下都統王國棟矢志忠貞臨難不屈捐軀為國深為可憫可給與拜他喇布勒哈番又一拖沙喇哈番并卹銀及祭葬銀以示優卹

命錄用効力行間武職官員

上諭兵部在外武職官員內有未經從逆効力行間勤勞日久枕戈藉甲身冒矢石建立功績者雖經議叙紀錄加銜加等但未得補授實缺仍在各標空糜歲月閒散無依或有赴部無缺候補日久食用艱迫俱屬可憫宜令赴部詳驗原劄即行補用其作何錄用確議以聞

己丑

命總督哈占招撫土司安泰寧

將軍總督趙良棟奏建昌衛土司安泰寧猶抗
不雜髮收聚賊衆逆跡顯然理宜勦滅以定民

心

上諭建昌地關重要川陝總督哈占將軍王進寶四川
巡撫抗愛等多方招撫土司安泰寧勿致生事若抗
拒不服該將軍酌撥官兵速行除翦

甲午

命大將軍簡親王喇布兼轄南寧兵

大將軍賴塔奏進勦滇南時曾於粵西南寧府
留每佐領兵三人雲南南寧相距甚遠難以遙
制乞撤此兵還京師

上諭雲南省城尚未恢復南寧之兵不便撤還雲南南
寧相距甚遠賴塔難以遙制此兵可令大將軍簡親
王喇布兼轄

己亥

命量撤四川廣西及荊州漢中諸路滿兵還京師

大將軍貝子彰泰賴塔等奏今逆賊馬寶等俱
降夏國相黨與解散奔竄廣東境內胡國柱雖
率衆往鶴慶麗江尚未撲滅現有都統希福提
督桑額率兵追捕逆賊形勢與前不同臣所有
兵力似已足用據報將軍噶爾漢總督哈占率
兵已抵貴州威寧總理糧餉學士佛倫等言此
兵皆至雲南則糧餉不足供用至日以廝役補
充缺額兵量行察汰則糧餉不致多糜而圍城

兵亦足用

上諭雲南兵既足用總督哈占盡率彼攜往之兵還四川駐川屬要地兼顧川陝四川所有滿兵留一千使副都統得爾德率之防守要地其餘俱令來還西安滿兵自四川還者令將軍佛尼勒率之鎮守漢中漢中所有滿兵俱令來還荊州亦係內地貝子準達及所統兵俱令來還粵西今已平定柳州留每佐領兵三人南寧留每佐領兵一人其餘俱令大將軍簡親

王喇布率之還京副都統莫達等兵令駐守貴陽署
副都統諾敏兵令退駐沅州

命遣醫往雲南治兵有疾者

上諭禮部聞雲南官兵疾疫者甚多彼土苦無良醫其
令太醫院醫官胡養龍王元佐馳驛前往治之

臣謹按殄滅寇氛固資兵力而使之鼓舞効
命實由於軫恤有加我

皇上撫養軍士恩澤素深及受遣四征又念其勞苦厚

之以廩糧資之以馬仗頒發帑金頻行獎賚
且屢

諭將領諸臣時時加意拊循是時大兵已薄滇南城下
因不耐水土多有疾病

皇上復加軫念以彼地苦無良醫特遣太醫院官馳往
療治

聖心至仁憫恤士卒誠為亘古所未有宜乎三軍之衆
感戴

高厚同心協力滅寇恢疆立奏捷功也

九月丁卯

嚴飭大將軍公圖海

兵部奏大將軍公圖海咨稱將軍王輔臣自漢
中來至西安於八月二十九日病故其壻薛英
等請攜骸骨家口往平涼其標下官兵作何區
處乞部議奪察輔臣下官兵原係多事之時添
設今四川陝西俱已平定此兵宜裁去其官弁

聽該督酌量題補更移文陝撫輔臣骸骨家口
俾送至京師

上允之復

諭曰王輔臣乃旗人其呈請骸骨家口發往平涼圖海
乃為咨部請示殊不合其嚴飭行

已已

勅將軍覺羅吉哈禮移兵合圍雲南省城

吉哈禮奏臣自雅州深入已抵金沙江官兵多

病糧餉久絕勞憊已極勢難追勦胡國柱等

上諭將軍吉哈禮可率兵前往與大將軍貝子彭泰合
軍圍困雲南省城如往追胡國柱都統希福提督桑
額等兵力單弱貝子彭泰等仍酌發驍壯之兵以濟
之尋署副都統熙符咨稱將軍吉哈禮自惠泉衛疾
作行至武定府於九月一日身故兵部以

聞

上諭將軍吉哈禮既已病故此兵抵滇令大將軍貝子

彰泰統轄其將軍勅印彰泰仍行收貯

辛未

勅令戴罪官員兵丁速取雲南省城

上諭議政王等曰雲南省城圍困已久若不速為克取
未免勞敝兵民糜費糧餉今逆賊外援已絕株守孤
城窮迫已極我軍中戴罪圖功之員不少宜令其攻
城建績以贖前愆且投誠官兵內亦多有欲立功贖
罪者今惟遷延引日待賊食盡恐糧餉漸至於虛糜

兵丁亦苦於疾病其移檄大將軍貝子彰泰賴塔等
均派戴罪官兵及投誠綠旗官兵連行政取雲南省
城

甲戌

命副都統得爾德仍留雲南

大將軍貝子彰泰賴塔等奏先奉

上諭令副都統得爾德率兵守四川今得爾德呈請願
留雲南効力議政王等議不准

上諭得爾德既抵雲南即留軍前其留蜀官兵令叅領
傳喀統之鎮守蜀地

馬寶伏誅

時馬寶械送至京

上諭馬寶身受國恩不思報効逆賊吳三桂背叛即首
先從逆所在抗拒大兵後大敗於楚雄欲逃無路始
來投誠情罪殊為可惡著即凌遲處死梟示

乙亥

命撤雲南老弱廢疾官兵還京師

大將軍貝子彭泰賴塔等報稱見在雲南大兵
需餉甚多倘有不繼所關甚大公議於臣等二
路兵內凡廝役補充甲兵中傷殘廢老邁官兵
及陣亡病故官兵骸骨俱令佐領博霽等率之
於本月六日啓行前往湖廣荊州護軍統領佟
佳率至之兵已付副都統妙齊納統領令駐守
貴州安順又令將軍蔡毓榮等於圍困雲南綠

旗兵內量裁六千人

上諭廢殘官兵及已故官兵骸骨若留於荊州徒費錢糧可俱徑攜至京此官兵及大將軍簡親王喇布率還之兵何隊先至武昌可候齊到喇布一同攜歸

十月甲申

命大將軍貝子彰泰賴塔等遣兵防守中甸

彰泰等奏中甸諸處從來皆隸麗江原為內地吳逆陰蓄異志康熙九年割給蒙古此地遠在

金沙江外我

朝從未遣兵駐守且逆賊胡國柱等復奔鶴慶麗江而雲南省城尚未恢復不便即議遣發官兵駐守議政王等議言俟恢復雲南省城勦滅胡國柱之日令貝子彰泰等詳議以聞

上諭中甸最為要地前於鶴慶麗江雖設總兵官一員令其兼轄中甸但無專汛官兵似猶可慮其移文大將軍貝子彰泰賴塔將軍總督趙良棟巡撫王繼文

提督桑額酌量遣發綠旗官兵鎮守俟達賴喇嘛使
至理藩院以遣兵鎮守之故移文曉諭

壬辰

命撤閩粵藩下旗員還京師

上諭議政王等曰今逆賊殄滅疆宇悉平耿精忠尚之
信屬下旗員俱應撤還京師量行安插除將軍馬九
玉并隨伊出征官員外其在福建及移駐杭州耿精
忠屬下官員廣東尚之信屬下官員悉令來京啟行

之時該將軍大臣撥滿洲章京每翼各一員并酌撥
綠旗官兵護行沿途勿使生事

癸巳降貝子準達為鎮國公

議政王等奏固山貝子準達率蒙古兵前赴荆
州不即與順承郡王勒爾錦詳議渡江討賊勉
圖前進失誤機會不能擊敗來犯鎮荆山之賊
俾鎮荆山為賊所據遺棄陣亡兵丁尸骸副都
統蘇祐濟遣人請援不即遣兵往助致二處高

阜皆為賊有屢

命進勦逆賊譚洪彭時亨等乃託故逗遛不行前進準
達宜解宗人府左宗正任降固山貝子為鎮國
公

上從之

丁酉

命由蜀進滇滿兵屯駐建昌諸處

大將軍貝子彭泰賴塔等處署副都統熙衍率

每佐領兵一人自四川來至雲南今雲南糧餉甚艱且滿漢官兵亦已足用大渡河與雲南相去甚遠恐後來勞憊之兵難以全至不可不預為籌畫

上諭雲南見在糧餉未充兵已足用其自蜀赴滇之兵已渡大渡河者副都統席布率之駐建昌仍聽大將軍貝子彭泰等調遣未渡者令席布委一人之首領就近還駐成都聽總督哈占統轄

辛丑

命嚴趣各省錢糧速致雲南

大將軍貝子彭泰賴塔等奏今滇城未復值茲
冬寒草枯牧畜無所兵卒養馬甚艱部撥錢糧
請速趣運致

上諭戶部部撥軍餉雖程限甚嚴往往不能即達者皆
因該管及沿途官員不速行輸解督趣遷延時日之
故爾部移文各督撫已起解者星夜速趣運致未起

解者速令啟行更檄沿途督撫嚴督所在官員趣所
運錢糧速達雲南勿誤若沿途官員有違誤者并該
督撫從重治罪決不輕恕

甲辰

命設雲南督標官兵發將軍總督趙良棟原兵還陝西
議政王等奏雲南大兵俱億浩繁今羣寇盡滅
疆土寧靖將軍總督趙良棟自陝西率領進剿
官兵宜暫留五千於雲南餘俱令發還陝西俟

雲南省城既復所留之兵亦即發回

上諭將軍總督趙良棟宜設督標經制官兵可取前任雲貴總督標下隨征之兵補入如不足更以雲南投誠支糧之兵補入其管兵官員聽趙良棟選擇才能擬補具題既設此兵其原統進征雲南綠旗官兵勞苦日久俱令發回陝西固守各汛陝西為邊疆重地關係甚要趙良棟進剿時曾留官兵於四川防守要隘總督哈占可撥四川官兵更代防守此陝西官兵

亦速發原汛固守疆圉

丁未

命造浮橋於盤江

巡撫楊雍建以修造鐵索橋宜用何項錢糧具
疏請示工部議動用捐助錢糧

上諭諸凡馳遞軍機轉輸兵餉所關甚重不容頃刻緩
今修造鐵索橋必致稽遲時日聞盤江可造浮橋貴
州巡撫楊雍建可速行監造浮橋其鐵索橋俟錢糧

充足之日該督撫題明動支正項錢糧修造

平定三逆方畧卷五十九

欽定四庫全書

平定三逆方畧卷六十

康熙二十年十一月丙辰

命復總督哈占蔡毓榮官

先是哈占蔡毓榮以罪革職留任効力贖罪至是

上諭吏兵二部總督哈占蔡毓榮率兵勦賊直抵雲貴
勞績茂著可復其原官

丁巳

命免大將軍公圖海罪

上諭兵部圖海年老有疾雖有微愆非斷不可宥者所記之過其俱與寬釋

癸亥大將軍貝子彭泰賴塔等奏克雲南省城

大兵進圍雲南數閱月不下

上慮曠日持久兵民胥困乃

降敕趣之於是彭泰等即於十月初八日統率滿漢官

兵進薄城下并力環攻賊勢惶迫無措二十八
日夜偽將軍線絨吳國柱吳世吉黃明原任都
統何進忠原任巡撫林天擎等謀擒逆首吳世
璠郭壯圖以獻世璠聞變自殺壯圖及其子宗
汾皆自刎死二十九日絨等率衆出城降遂擒
首謀獻計之偽大學士方光琛及其子潛侄
偽學士學範至軍前磔之戮世璠屍傳首京師
彰泰等以

聞

上嘉之曰覽貝子等奏統領滿漢官兵遵奉成命進取
雲南圍困省城今復遵旨進攻逆賊危迫偽將軍線
絨吳國柱等設計通款欲執逆渠獻城吳世璠及郭
壯圖父子困急俱自刎而死斬首送京師逆黨方光
琛父子俱行伏誅偽文武官員軍民人等悉皆歸誠
恢復雲南省城疆宇蕩平具見籌畫周詳調度有方
勦撫並用克奏膚功朕心深為嘉悅其從優議叙具

奏尋彰泰等又奏偽將軍夏國相等敗遁廣東臣等
檄令土官僕朋及防守臨安總兵官李國樑率
兵追勦直抵西板橋環圍之塞其去路國相與
偽將軍王永清黃福李攀龍楊公魁率偽屬官
兵至軍前各繳偽印劄降臣等公議斬攀龍等
於軍國相為吳三桂壻乃賊渠著名者宜送京
師正法又都統希福追勦逆賊胡國柱等至雲
龍州之青里屋國柱度不能脫遂自縊王敘李

臣皆自焚死偽將軍王公良等率餘衆悉降

臣謹按是時諸路大兵雲集滇南已圍其城若奮力亟攻不難立拔而諸將猶稽延時日不急於從事

皇上念賊渠一日未除則兵民一日未得寧息因降

敕趣師令速行進取我兵乃薄城下并力環攻賊勢惶迫世璠自殺其黨遂以城降於是羣寇盡滅諸路悉平王師騰獻凱之歌萬姓獲解懸之

樂誠由

皇上心切救民嚴師趣戰故能使逆寇一旦掃除天下
共享太平之福而長頌永清大定之烈也

十二月己亥以逆寇蕩平

詔赦天下

詔曰朕纘承丕緒統御寰區仰惟

天地眷祐之庥

祖宗付託之重

聖祖母太皇太后慈訓之殷蚤夜孜孜勤求化理期於兵革寢息海宇乂安不意逆賊吳三桂負國深恩倡為變亂陰結奸黨同惡相援抗違詔令竊據疆土滇黔閩浙楚蜀關隴兩粵豫章之間所在騷肆痛毒三桂僭稱偽號逆焰彌滋負罪尤甚朕恭行天討分命六師勦撫並施德威互濟或繫頸於闕下或駢戮於師中擒捕誅鋤以次收服乃三桂既膺神殛逆孫世璠猶復鴟張踞六詔之一隅延殘喘以拒命朕惟

賊患一日不除則民生一日不靖策厲將士屢趣師
期於是虎旅協心進逼城下賊衆計窮勢蹙通款軍
門約日獻城兇渠授首師克之日市肆不擾邊境晏
如捷書既至上慰

郊

廟

社稷之靈下抒中外臣民之憤神人胥悅遐邇騰歡念自
變亂以來軍民荼苦如在水火披堅執銳卒歲靡寧

行齋居送千里相望被兵之地既罹於鋒刃供億之
衆復困於徵輸朕閔恤民艱不忍輒加額賦間施權
宜之令用濟征繕之需意在除殘事非獲已而身處
宮寢之內外厓閭閻之依中夜屢興盱食不暇怒焉
思治八載於茲今羣逆削平疆圉底定悉剪歷年之
蠱賊永消異日之隱憂用是蕩滌煩苛維新庶政大
沛寬和之澤冀臻熙皞之風所有事宜開列於後於
戲體覆載好生之德秋肅必繼以春溫法帝王更化

之模義正尤期於仁育誕告天下咸使聞知欽惟我
皇上聖德誕敷神謨廣運削平羣逆敕定疆隅永底治
安長銷金革鴻敷駿業振古莫京臣等伏覩
八年之內兵間進止悉奉

宸規凡水陸攻守之宜竒正疾徐之用諸將祇遵

成命則所向有功稍一愆稽輒多僨績應如符契瞭若
列筭今茲載筆是司惟按事直書不敢片言
文飾臣等至愚且陋末由洞測

高深故於丕烈殊猷不能備悉第就管窺所及見諸事
蹟確然有據者謹為揚擢焉蓋三逆素蓄狡
謀多行不軌背恩反叛厥罪惟均而倡亂煽
禍吳三桂實為戎首當三桂之初反也恃其
險遠僭竊一隅變雖作於滇黔毒未流於鄰
境

皇上一聞黨務禮等上變即料三桂老賊多詐必覘我
未備亟爭楚南窺伺巴蜀巴蜀阻隘而楚南

魚稻之鄉苟為賊有未易猝破我兵先據之
則可以搯其咽喉而使之立困故亟簡禁旅
命順承郡王勒爾錦為大將軍統之南征撲滅逆寇隨
調西安將軍瓦爾喀就近赴蜀堅守以備賊
之旁軼又令前鋒統領碩岱等兵日支芻糗
兼程先赴荊州固軍民之心即進據常德以
遏賊之內侵都統珠滿等馳往岳州扼水陸
要害壯粵西聲勢以防賊之橫截均飭其速

發無失機會是

皇上籌畧英明計慮深遠調遣布置誠至神速至周密也設是時守土諸臣盡力干拯各保四封之內領兵將帥遵奉

詔旨並星夜邁行乘賊鋒未至控扼其險要則三桂之兵必不能深入川湖坐致罷散固無難於立滅耳乃瓦爾喀師行少緩蜀變旋生碩岱等雖迅速抵荊未即長驅以守常德珠滿等不

亟至岳州迨武昌非誤事機以致常德
沙岳州相繼變作而湖南諸郡邑盡為賊
逆勢寢張孫延齡以桂林叛耿精忠以福
反震鄰及於江浙之區迨將軍赫業與瓦
喀會師進克朝天諸關已抵廣元不即規
保寧途次稽延俾賊得為固守計川陝督
不能接濟軍食我師遂以糧盡引退王輔
之兵復變於寧羌而漢興不守秦中亦多

靖

皇上既增發將士分討叛寇更以諸路之中湖南最要爰趣大將軍順承郡王勒爾錦渡江勦賊而

命大將軍貝勒尚善取岳州大將軍安親王岳樂取長沙又慮吳逆犯江西斷粵路調大將軍簡親王喇布赴江西鎮守勒爾錦顧不思前進安坐荊州老師糜餉屢失軍機尚善亦多端諉託宿留彌時岳樂既下萍鄉不乘勝亟拔長

沙致賊黨來援嬰城相拒刺布不保固吉安
為賊所陷復致尚之信叛於廣東當是時

皇上系降嚴綸趣湖南諸將速行攻擊而諸將始終猶
豫瞻顧莫前以故逆燄披猖羣兇蠭起如滋
蔓然甚難圖也幸

皇上深悉地理灼見軍情謂彼時滅賊之機繫乎岳州
取岳州非斷其餉道不可因

特遣尚書伊桑阿督造戰艦調集師徒授策於大將軍

貝勒尚善察尼令其盡據江湖斷賊餽運於
是三桂見勢已危迫憂怖以死而岳州之賊
食盡力殫棄城竄遁長沙常德諸郡以次收
復羣寇之在川粵間者亦靡不悚慄喪氣湖
南既平

皇上遂命諸路大兵乘機赴勦而秦中諸帥徂於成見
交章入奏皆言未可進兵仰藉

聖明獨斷痛斥其非飭令大將軍公圖海等分路速收

漢興規定巴蜀復

特遣學士希福等齎

敕鼓勵諸路綠旗官兵及將軍王進寶趙良棟兩軍先
入恢復漢中龍安即調將軍烏丹為王進寶
後繼將軍鄂克濟哈為趙良棟後繼遣郎中
額爾赫圖等催將軍噶爾漢等進兵夔州而
敕大將軍貝子彰泰由貴州大將軍賴塔由廣西進取
雲南更遣學士額庫禮等趣賴塔軍泊我師

克保寧成都底平岷益隨令將軍吉哈禮趙
良棟等兵赴滇會勦諸將因仰遵

指示部分前趨賊果不能抵拒望風披靡我兵遂直薄
滇池雲集霧合環攻其城郭逆孽世璠旋即
授首醜類咸俘斬無遺而狂氛盡掃六詔底
寧軍民胥得息肩矣耿精忠乘雲貴之亂竊
踞八閩侵掠鄰封肆其兇虐浙東江右咸騷
然其不寧大將軍康親王傑書奉

命薄伐宜即親抵三衢董率戎伍擊破賊衆疾走仙霞
而徒以溫台伏莽未清駐節金華久淹月日
皇上遠算宏圖揆其輕重以為先破犯衢之賊進平福
建則其他小醜自當解散乃趨傑書亟赴衢
州復示以

成畫令分兵斷賊大溪灘餉道果大敗其衆逐北追奔
直壓閩境巖關旋下所至授戈精忠束身乞
降而溫州諸賊亦皆盪定精忠既蒙

天恩曲貸猶自取誅戮結連海寇潛構逆謀為部人徐
鴻弼等所發逮至京師推訊得實磔之都市
亂萌消遏斯閩土所以無虞也尚之信負恩
干紀脅父稱兵與三桂交通敢為大逆

皇上命將軍拉哈達以兵抵潮陽莽依圖以兵臨韶郡
兩路夾擊用蹙廣州之信恐懼無措始具疏
服罪夫何歸順之後怙終好亂固有悛心屢
奉

明綸俾其親率官兵進勦潮州湖南而抗

旨不前後雖殪為出師輒自引退廣行不法復思一逞
為其屬張永祥等首告

皇上隨遣侍郎宜昌阿即訊又慮廣城或有意外因馬
永蔭叛

敕將軍賴塔移師鎮潮以陰為之備迨之信既就拘繫
其黨惡果掇甲執兵猝生變亂於時賴塔之
兵已抵粵城故狡詐莫施悉為我軍所禽戮

之信亦以逆謀得實伏誅禍本既除服領以南始按堵如故焉由是觀之平定三逆無一不本於

皇猷即其餘叛逆之徒如王輔臣劉進忠楊來嘉譚洪馬承蔭祖澤清等次第銷滅凡恩威兼施勦撫並用均仗

聖謨夫豈內外諸臣所能仰贊於萬一者至於訓將帥以肅紀律賚士卒以示鼓勵設馬站以速奏

報練水師以資戰功捍守內地之慎固防範
邊陲之嚴密招納賊黨之寬大綏輯百姓之
慈惠遣兵則遞相遷代而行者不勞籌餉則
就近轉輸而居者不困

睿謀淵邃勝算周詳亦非諸臣所能見及者也蓋

皇上之洞鑷燭微萬里畢照至明也決機發策羣議莫
撓至斷也開誠布信賞罰無私至公也鏡往
察來綜畫有素至豫也而一本於

聖心之至仁不忍生民之罹於塗炭而亟欲出諸水火
登之衽席故頻趣王師邁進而又系頒

諭旨令諸將帥加意撫恤閭閻不得稍有侵暴即攻克
城邑亦毋許妄戮良民

神武不殺遠邁百王

智勇天錫超越千古夫是以海寓乂安黎庶康樂七德
咸昭五兵不試誠哉巍巍蕩蕩永清大定之
勲億萬年無疆之祚也若夫平滇之後

德音疊布薦上

徽稱祇謁

山陵徧行望秩告成功而不有却

尊號而勿居典禮隆茂德業愈光他如

召還禁旅酌設鎮防安插授誠將弁而消隱慝分別逆
屬人口而免株累屢蠲租賦以蘇民困頻加
恩恤以酬軍勞自大將軍以逮兵士俱詳察
其功罪有功者即畀之爵賞縱疎賤而不遺

有罪者務加以處分雖至戚而罔貫政令精
明規模宏遠總之

皇上乃聖乃神允文允武戡禍亂開太平經理靡弗盡
善如上天之絳難以名言臣等雖勉綴數詞
亦過綜括大凡實自愧於

至德豐功敷揚莫罄云爾

平定三逆方畧卷六十